

Kulturpris Samnanger 2023

Eg vil nominera **Samnanger skulemusikklag** til kulturprisen i Samnanger for 2023 !

Fellesskap, inkludering og læring

Skulemusikken er ein viktig kulturarena i Samnanger, og har vore det over mange år. Skulemusikken er eit lag der det er plass for alle, uansett nivå og ambisjon. Her kan barn og unge få utvikla seg i sitt eige tempo, og alle er like viktig, uansett om ein speler solo eller speler tredje stemme. Alle blir inkludert, og er ein viktig fritidsaktivitet i bygda, også for dei som kjem frå andre land. Skulemusikken har tett samarbeid med kulturskulen. Opplæringa på instrumentet er gjennom kulturskulen, men gruppeøvingane er i skulemusikken. Det er her ein lærer samspel med andre. Skulemusikken er ein viktig læringsarena, og er ein stad der den enkelte får oppleve meistring, og dette er noko som gjev gode ringverknader, både i skulearbeid og generelt elles i livet.

På tvers av alle aldersgrupper

Skulemusikken er også ein aktivitet på tvers av aldersgrupper, der dei yngste har dei eldste å strekke seg etter, og dei eldste lærer å ta omsyn til dei yngste.

Profesjonalitet, kvalitet og trivsel

Dirigentane i skulemusikken er høgt utdanna, og gir verkeleg inspirasjon til musikantane til å yta sitt beste. Skulemusikken har hevda seg veldig godt i konkurransar, både enkeltmusikantar, juniorkorpset og hovudkorpset. Dette kjem av godt og målretta arbeid, med satsing på god opplæring og gode instrument, og ikkje minst at det skal vere kjekt å spele. Gode resultat kjem av god trivsel !

Vidare karriereveg eller hobby for resten av livet

Å ha spelt i skulemusikken gir også god grobott for vidare for musikalsk aktivitet. Dette gjeld både som utøvarar på profesjonelt nivå eller på hobbybasis. Å spele i skulemusikken, kan gi ein hobby for livet. Det er mange av musikantane i skulemusikken som har spelt i andre korps, som Hordaland Ungdomskorps og Dragefjellet Musikkorps. Det er også mange av dei tidlegare musikantane som har studert musikk vidare, og satsa på ein karriereveg innan musikk.

Positive ringverknader til kommunen

Lokalt rekrutterer skulemusikken til Tysse og Nordbygda musikklag. Mange musikklag i nabokommunane har knapt medlemmer under 50 år, men i Tysse og Nordbygda Musikklag så er omtrent ein tredjedel musikantar frå skulemusikken, der mange held fram å spele der etter at dei er for gamle til å spele i skulemusikken.

Oppsummert

Kulturprisen for 2023 bør tildelast Samnanger skulemusikklag, som er ein viktig læringsarena, eit musikalsk fellesskap, eit profesjonelt lag med høg trivselsfaktor og viktig grobott for kulturell utvikling i kommunen og for den enkelte musikanter.